

# 60 milliuns svieuta a Tavau grazia al FEM

## Da las tractativas dal cussegl grond

■ **(anr/fa) Pliras deputadas e plirs deputads al cussegl grond han fatg adiever da l'ocasiun da far dumondas a la regenza grischuna. Ina dumonda aveva da far cun ospitals regiunals al cunfin, in'otra cun il FEM.** «Il 48avel Forum Economic Mundial FEM a Tavau ha pudì vegnir realisà, sco ch'igl è vegnì rapportà, cun success, la segirezza saja stada permanentamain garantida», ha ditg il deputà *Lorenz Alig* (pld, Glion) mesemna a chaschun da l'ura da dumondas. El ha dumandà cusseglier guvernativ *Christain Rathgeb* co che la regenza fetschia per pudair garantir la segirezza er ils proxims onns e tge niz economic ch'il chantun Grischun haja dal FEM. Rathgeb ha respus ch'ils partenaris en connex cun la segirezza, la polizia chantunala grischuna e d'auters chantuns ed il militar, examineschian permanentamain la situaziun mundiala en connex cun privels potenzials. «In dispositiv robust en connex cun la segirezza resta vinavant necessari per realisar il FEM er ils proxims onns», ha el infurmà avant che numnar il niz dal FEM: «Dal 2017 ha gi Tavau grazia al FEM 60 milliuns francs svieuta, en tut la Svizra, cun Tavau, han ins registrà ina svieuta da 94 milliuns francs.» Ch'enpli rapportian mintg'onn fin 500 schurnalists dal forum a Tavau, «ina reclama nunpajabla era per il turissem svizzer.»

*Karl Heiz* (pld, Poschiavo) s'ha infurmà davart las finamiras da la collavuraziun internaziunala en il sector da la sanadad publica ed il stadi da las tractativas. Cussegljer guvernativ Rathgeb ha discurrì d'ina situaziun win-win: «La finamira è da porscher il provediment da basa er a las regiuns cunfinantas talianas

ed austriacas. Da l'otra vart pon vegnir occupads uschia megljer era noss ospitals regiunals.» Sco exempel ha el menziunà il Center da sandà Val Müstair cun l'ospidal a Sta. Maria che porscha er als abitants dals vitgs vischins en il Tirolo dal sid il provediment da basa. «Las tractativas cun l'Italia nun èn però concludidas dal tut, ins spetga anc la risposta da Roma.»

Era la regenza infurmada davart ils plans da l'Agentura telegrafica svizra (SDA/ATS) e co ha ella reagì? Quai ha

dumandà *Conradin Caviezel* cusseglier guvernativ *Martin Jäger*: «La regenza prenda cun quitads conuschientscha da l'intent da la SDA, fin uss nun è ella vegnida orientada da vart dals responsabels da quests plans», ha ditg Jäger, «la SDA procura cun ses rapports da tut il pajais era per la coesiun da las differentas regiuns linguisticas.» Al cumenzament da favrer ha scrit la regenza grischuna, «coordinà cun il chantun Tessin», a la direzziun da la SDA ed exprimì ses quitads.



**Deputà Lorenz Alig (pld Foppa) ha vulì savair da la regenza co ella fetschia per garantir la segirezza dal FEM er ils proxims onns.**

FOTO M. HARTMANN